

摘藻堂四庫全書薈要

史部

欽定四庫全書薈要卷七千六百十八

史部

水經注卷七

後魏 酈道元 撰

濟水

濟水出河東垣縣東王屋山為沔水

山海經曰王屋之山

案近刻脫此四字

聯水出焉西北流注

于秦澤

案秦近刻訛作秦

郭景純云聯沔聲相近即沔水也

潛行地下至共山南復出于東丘今原城東北有東

丘城孔安國曰泉源為沆流去為濟春秋說題辭曰

濟齊也齊度也貞也風俗通曰濟出常山房子縣贊

皇山廟在東郡臨邑縣濟者齊也

案近刻脫此三字

齊其度

量也余按二濟同名

案名下近刻衍也字

所出不同鄉原亦別

案原近刻訛作源

斯乃應氏之非矣今濟水重源出軹縣西

北平地

案軹縣近刻訛作溫城

水有二源東源出原城東北

案

刻重一城字

昔晉文公伐原以信而原降即此城也俗以

濟水重源所發因復謂之濟源城其水南逕其城東

故縣之原鄉

案漢書地理志軹縣孟康曰原鄉晉文公所圍是也此故縣即承上文軹縣言

杜預曰沁水縣西北有原城者是也

案沁近刻訛作沁又是字訛在

也字下

南流與西源合西源出原城西

案西字近刻訛作而東流

水注之

案流字近刻訛作沅

水出西南東北流注于濟濟水又

東逕原城南東合北水亂流東南注分為二水一水

東南流俗謂之為衍水即沅水也衍沅聲相近轉呼

失實也

案轉近刻作傳

濟水又東南逕絺城北而出于溫矣

案絺原本及近刻竝訛作郗今考左傳蘇忿生之田絺其一也後漢志波縣有絺城在今懷慶府西南三

十二 其一水枝津南流注于湔湔水出原城西北原

山勲掌谷

案近刻脫一湔字

俗謂之為白澗水南逕原城西

春秋會于湔梁謂是水之墳梁也爾雅曰梁莫大于

湔梁梁水堤也湔水又東南逕陽城東與南源合水

出陽城南溪陽亦樊也一曰陽樊國語曰王以陽樊

賜晉陽人不服文公圍之倉葛曰陽有夏商之嗣典

樊仲之官守焉君而殘之無乃不可乎公乃出陽人

春秋樊氏叛惠王使虢公伐樊執仲皮歸于京師即

此城也其水東北流與漫流水合水出軹關南東北

流又北注于湫

案湫原本及近刻並訛作漫今改正

謂之漫流口湫水

又東合北水亂流東南左會濟水枝渠湫水又東逕

鍾繇塢北世謂之鍾公壘又東南塗溝水注之水出

軹縣西南山下北流東轉入軹縣故城中又屈而北

流出軹郭漢文帝元年封薄昭為侯國也又東北流

注于湫湫水又東北逕波縣故城北漢高帝封公上

不害為侯國

案湫水所逕乃今濟源縣東南二十里波城不害封汲侯或波訛作汲耳

水又東南流天漿澗水注之水出軹南臯

案近刻訛作畢下同

向城北城在臯上

案近刻脫城字

俗謂之韓王城非也京相

璠曰或云今河內軹西有城名向

案城近刻訛作地

今無杜

元凱春秋釋地亦言是矣蓋相襲之向故不得以地

名而無城也關駟十三州志曰軹縣南山西曲有故

向城即周向國也傳曰向姜不安于莒而歸者矣汲

郡竹書紀年曰鄭侯使韓辰歸晉陽及向二月城陽

向更名陽為河雍向為高平即是城也其水有二源

俱導各出一溪東北流合為一川名曰天漿溪又東

北逕一故城俗謂之冶城

案治近刻訛作治下同

水亦曰冶水

又東流注于淠淠水又東南流右會同水水出南原

下

案原近刻訛作源

東北流逕白騎塢南塢在原上為二溪

之會北帶深隍三面阻險惟西版築而已東北流逕

安國城西又東北注淠水淠水東南逕安國城東又

南逕母辟邑西世謂之無比城亦曰馬髀城皆非也

朝廷以居廢太子謂之河陽庶人淠水又南注于河



又東至溫縣西北為濟水又東過其縣北

濟水于溫城西北與故瀆分南逕溫縣故城西周畿  
內國司寇蘇忿生之邑也春秋僖公十年狄滅溫溫  
子奔衛周襄王以賜晉文公濟水南歷虢公臺西皇  
覽曰溫城南有虢公臺基址尚存濟水南流注于河  
郭緣生述征記曰濟水案近刻脫水字河內溫縣注于河蓋  
沿歷之實證非為謬說也濟水故瀆于溫城西北東  
南出逕溫城北又東逕虢公冢北皇覽曰虢公冢在

溫縣郭東濟水南大冢是也濟水當王莽之世川瀆  
枯竭其後水流逕通津渠勢改尋梁脈水不與昔同  
屈從縣東南流過隤城西案隤近刻訛作墳下同又南當鞏縣北  
南入于河

濟水故瀆東南合奉溝水水上承朱溝于野王城西

東南逕陽鄉城北案此下近刻重又東南流逕陽鄉城北九字

又東南逕

李城西秦攻趙邯鄲且降傳舍吏子李同說平原君  
勝分家財饗士得敢死者三千人李同與赴秦軍秦

軍退同死

案近刻作李同死

封其父為李侯故徐廣曰河內

平臯縣有李城即此城也于城西南為陂水淹地百

許頃蒹葭萑葦生焉號曰李陂又逕隕城西屈而東

北流逕其城北又東逕平臯城南應劭曰邢侯自襄

國徙此當齊桓公時衛人伐邢邢遷于夷儀其地屬

晉號曰邢丘以其在河之臯勢處平夷

案近刻訛作處勢平夷

故曰平臯瓚注漢書云春秋狄人伐邢邢遷夷儀不

至此也

案近刻脫也字

今襄國西有夷儀城去襄國百餘里

平臯是邢丘非國也余按春秋宣公六年赤狄伐晉圍邢丘昔晉侯送女于楚送之邢丘即是此處也非無城之言竹書紀年曰梁惠成王三年鄭城邢丘司馬彪後漢郡國志云縣有邢丘故邢國周公子所封矣漢高帝七年

案近刻訛作六年

封碭郡長項佗為侯國

案佗近刻訛作伯

賜姓

劉氏武帝以為縣其水又南注于河也

與河合流又東過成臯縣北又東過滎陽縣北又東至

礫溪南

案原本及近刻竝作又東至北礫礫南北字後人所加漢書溝洫志顏師古引水經泝水東過

礫谿無北字可證辨又詳注內

東出過滎澤北

案滎澤原本及近刻竝訛作滎陽今考此即注

內所謂滎澤在滎陽縣東南者也

釋名曰濟濟也源出河北濟河而南也晉地道志曰濟

自大伾入河與河水鬪南決為滎澤尚書曰滎波既豬

孔安國曰滎澤波水已成遏豬

案近刻脫澤字遏字

闕駟曰滎播

案近

刻訛作滎波

澤名也故呂忱云播水在滎陽謂是水也昔大禹

塞其淫水而于滎陽下引河東南以通淮泗濟水分河

東南流漢明帝之世司空伏恭薦樂浪人王景字仲

通好學多藝善能治水顯宗詔與謁者王吳

案原本及近刻並訛

作吳下同今改正

始作浚儀渠吳用景法水乃不害此即景吳

所脩故瀆也

案吳近刻訛作作

渠流東注浚儀故復謂之浚儀

渠

案此下近刻有也字

明帝永平十五年東巡至無鹽帝嘉景功

拜河堤謁者

案此下近刻有漢字

靈帝建寧四年于敖城西北壘

石為門以遏渠口謂之石門故世亦謂之石門水門廣

十餘丈西去河三里石銘云建寧四年十一月黃場石也

而主吏姓名磨滅不可復識

案朱謀埠云玉海引水經注浚儀縣竹書紀年梁惠

成王三十一年三月為大溝于北郭以行圃田之水陳  
留風俗傳曰縣北有浚水像而儀之故曰浚儀續述征  
記曰汴河到浚儀而分汴東注河南流建寧四年于敖  
城西北壘石為門以遏渠口謂之石門故世亦謂之石  
門水門廣十餘丈西去河三里石  
銘云建寧四年十一月黃場石 魏太和中又更脩之撤

故增新石字淪落無復在者水北有石門亭戴延之所

云新築城城周三百步

案城周近刻訛作周城

滎陽太守所鎮者

也水南帶三皇山

案近刻脫皇字

即皇室山亦謂之為三室山

也濟水又東逕西廣武城北

案此十字原本及近刻竝訛作經考廣武二城故山

及滎瀆所入皆值滎陽縣之  
西不得與經瀆案今改正

郡國志滎陽縣有廣武城

城在山上漢所城也高祖與項羽臨絕澗對語責羽十

罪羽射漢祖中胸處也山下有水北流入濟世謂之柳

泉也濟水又東逕東廣武城北

案此十字原本及近刻並訛作經

楚項

羽城之漢破曹咎羽還廣武為高壇

案近刻訛作祖朱謀埠云宋本作組

置太公其上曰漢不下吾烹之高祖不聽將害之項伯曰

為天下者不顧家但益怨耳羽從之今名其壇曰項羽堆

夾城之間有絕澗斷山謂之廣武澗項羽叱婁煩于其上

婁煩精魄喪歸矣濟水又東逕敖山北

案此八字原本及近刻並訛作



經

詩所謂薄狩于敖者也

案今詩作搏獸于敖

其山上有城即殷

帝仲丁之所遷也皇甫謐帝王世紀曰仲丁自亳徙囂

于河上者也或曰敖矣秦置倉于其中故亦曰敖倉城

也濟水又東合滎瀆

案此七字原本及近刻竝訛作經又滎瀆近刻訛作滎澤

瀆首

受河水

案首近刻訛作水

有石門謂之為滎口石門也而地

形殊卑蓋故滎播所導自此始也門南際河有故碑

云惟陽嘉三年二月丁丑使河堤謁者王誨疏達河

川遙荒庶土

案遙近刻作述

往大河衝塞

案往近刻訛作云

侵齧金

堤以竹籠石葺土而為竭

案近刻石下衍葺字

壞隕無已功消

億萬請以濱河郡徒疏山采石壘以為障功業既就

徭役用息未詳詔書許誨立功府卿

案近刻訛作鄉

規基經

始詔策加命

案策近刻訛作策

遷在沅州乃簡朱軒授使司

馬登令纘茂前緒稱遂休功登以伊洛合注大河南

則緣山東過大伾回流北岸其勢鬱懷濤怒湍急激

疾一有決溢彌原淹野蟻孔之變害起不測蓋自姬

氏之所常感昔崇鯨所不能治我二宗之所勛勞于

是乃跋涉躬親經之營之比率百姓議之于臣伐石  
三谷水匠致治立激岸側以捍鴻波隨時慶賜說以  
勸之川無滯越水土通演役未踰年而功程有畢斯  
乃元勲之嘉課上德之弘表也昔禹脩九道書錄其  
功后稷躬稼詩列于雅夫不憚勞謙之勤夙興厥職  
克國惠民安得湮沒而不章焉故遂刊石記功垂示  
于後其辭云云使河堤謁者山陽東緡司馬登

案緡近刻

訛作

字伯志代東萊曲成王誨

案曲成近刻訛作典城

字孟堅

河內太守宋城向豹

案近刻訛作  
守城向射

字伯尹丞汝南鄧

方字德山懷令劉丞字季意河堤掾匠等造陳留浚

儀邊韶字孝先頌石銘歲遠字多淪缺其所滅蓋闕

如也滎瀆又東南流注于濟

案原本及近刻並  
訛作浦今改正

今無

水次東得宿須水口水受大河渠側有扈亭水

案亭  
近刻

訛作  
城

自亭東南流注于濟今無水宿須在河之北不

在此也蓋名同耳自西緣帶山隰秦漢以來亦有通

否濟水與河渾濤東注晉太和中桓溫北伐將通之

不果而還義熙十三年劉公西征又命寧朔將軍劉  
遵考仍此渠而漕之始有激湍東注而終山崩壅塞

劉公于北十里東鑿故渠通之今則南瀆通津

案今近刻

訛作合

川澗是導耳濟水于此又兼邲目春秋宣公十

三年晉楚之戰楚軍于邲即是水也音卞

案音近刻訛作昔

京相璠曰在敖北濟水又東逕滎陽縣北

案此九字原本及近

刻竝訛作經今考自濟水分河東南流至此則經所謂過滎陽縣北也

曹太祖與徐榮

戰不利曹洪授馬于此處也濟水又東礫石溪水注

之

案此十字原本及近刻竝訛作經礫石溪上又加南字胡渭禹貢錐指云上有北礫溪故此為南礫

溪石字衍考下云世謂之礫石澗則石字非衍明矣經言礫溪于滎陽縣下此亦言于滎陽縣下豈有兩滎陽縣乎後人不察前屬經文後屬注文故妄加南北二字耳水出滎陽城西南李

澤澤中有水即古馮池也地理志曰滎陽縣馮池在

西南是也東北流歷敖山南春秋晉楚之戰設伏于

敖前謂是也逕號亭北池水又東北逕滎陽縣北斷

山東北注于濟世謂之礫石澗即經所謂礫溪矣經

云濟出其南非也

案濟東流而礫溪東北注之則濟至其北經不當云又東至礫溪南

故道元

濟水又東索水注之

案此八字原本及近刻竝訛作經

水出

京縣西南嵩渚山與東關水同源分流

案近刻訛作與東關分水

即古旃然水也

案近刻脫然字

其水東北流器難之水注之

山海經曰少陘之山器難之水出焉而北流注于侵

水即此水也其水北流逕金亭又北逕京縣故城西

入于旃然之水域故鄭邑也莊公以居弟段號京城

大叔祭仲曰京城過百雉國之害也城北有壇山岡

趙世家成侯二十年魏獻滎陽因以為壇臺岡也其

水亂流北逕小索亭西京相璠曰京有小索亭世語  
以為本索氏兄弟居此故號小索者也又為索水索  
水又北逕大柵城東晉滎陽民張卓董邁等遭荒鳩  
聚流雜保固

案近刻訛作  
流離堡固

名為大柵塢至太平真君

八年豫州刺史崔白

案豫近刻  
訛作穎

自虎牢移州治此又

東開廣舊城創制改築焉太和十七年遷都洛邑省  
州置郡索水又屈而西流與梧桐澗水合水出西南  
梧桐谷東北流注于索斯水亦時有通塞而不常流



也索水又北屈東逕大索城南春秋傳曰鄭子皮勞

叔向于索氏

案近刻訛作水

即此城也晉地道志所謂京有

大索小索亭漢書京索之間也索水又東逕虢亭南

應劭曰滎陽故虢公之國也今虢亭是矣司馬彪

案近

刻訛作故馬淵

郡國志曰縣有虢亭俗謂之平桃城

案桃近刻訛作

吽城內有大冢名管叔冢或亦謂之為虢吽城非也

蓋虢虢字相類字轉失實也風俗通曰俗說高祖與

項羽戰于京索遁于薄中羽追求之時鳩止鳴其上

追之者以為必無人遂得脫及即位異此鳩故作鳩杖以扶老案廣志楚鳩一名嗶啁號咷之名蓋因鳩以起目焉所未詳也索水又東北流須水右入焉水近出京城東北二里榆子溝亦曰柰榆溝也又或謂之為小索水東北流木蓼溝水注之水上承京城南淵世謂之車輪淵淵水東北流謂之木蓼溝又東北入于須水須水又東北流于滎陽城西南北注索索水又東逕滎陽縣故城南漢王之困滎陽也紀信曰

臣詐降楚王宜間出信乃乘王車出東門稱漢降楚  
楚軍稱萬歲震動天地王與數十騎出西門得免楚  
圍羽見信大怒遂烹之信冢在城西北三里故蔡伯  
喈述征賦曰過漢祖之所隘弔紀信于滎陽其城跨

倚岡原居山之陽王莽立為祈隊

案祈近刻訛作新

備周六

隊之制魏正始三年歲在甲子被癸丑詔書割河南

郡縣自鞏闕以東

案鞏字近刻訛在縣字上

創建滎陽郡并戶二

萬五千以南鄉筑陽亭侯李勝字公昭

案近刻訛作照

為郡

守故原武典農校尉

案故近刻訛作顧

政有遺惠民為立祠

于城北五里號曰李君祠廟前有石蹠蹠上有石的  
石的銘具存其畧曰百族欣戴咸推厥誠今猶祀禱  
焉索水又東逕周苛冢北漢祖之出滎陽也令御史  
大夫周苛守之項羽拔滎陽獲苛曰吾以公為上將  
軍封三萬戶侯能盡節乎苛瞋目罵羽羽怒烹之索  
水又東流北屈西轉北逕滎陽城東而北流注濟水  
杜預曰旃然水出滎陽成臯縣東入汭春秋襄公十

八年楚伐鄭右師涉潁次于旃然即是水也濟渠水

斷汭溝惟承此始故云汭受旃然矣

案汭近刻訛作吸

亦謂

之鴻溝水蓋因漢楚分王指水為斷故也郡國志曰

滎陽有鴻溝水是也蓋因城地而變名為川流之異

目濟水又東逕滎澤北

案此即經所謂東出過滎澤北也原本及近刻竝作滎陽

澤陽字衍

故滎水所都也京相璠曰滎澤在滎陽縣東南

與濟隧合濟隧上承河水于卷縣北河南逕卷縣故

城東又南逕衡雍城西春秋左傳襄公十一年諸侯

伐鄭西濟于濟隧杜預闕其地而曰水名也

案近刻訛作而

名之水也

京相璠曰鄭地也言濟水滎澤中北流至衡雍

西與出河之濟會南去新鄭百里斯蓋滎播河濟往

復徑通矣

案徑近刻作徑

出河之濟即陰溝之上源也濟隧

絕焉故世亦或謂其故道為十字溝自于岑造八激

堤于河陰水脈徑斷故瀆難尋又南會于滎澤然水

既斷民謂其處為滎澤春秋衛侯及翟人戰于滎澤

而屠懿公弘演報命納肝處也有垂隴城濟瀆出其

北春秋文公二年晉士穀盟于垂隴者也京相璠曰

垂隴鄭地今滎陽東二十里有故垂隴城

案近刻脫垂字

即

此是也世謂之都尉城蓋滎陽典農都尉治故變垂

隴之名矣瀆際又有沙城

案瀆近刻訛作澤

城左佩濟瀆竹

書紀年梁惠成王九年王會鄭釐侯于巫沙者也瀆

際有故城世謂之水城

案近刻脫之字又此句之下衍非也二字

史記秦

昭王三十二年

案近刻訛作四十二年

魏冉攻魏走芒卯入北

宅即故宅陽城也竹書紀年曰惠成王十三年

案近刻脫

成字

王及鄭釐侯盟于巫沙以釋宅陽之圍歸釐于鄭

者也竹書紀年晉出公六年齊鄭伐衛荀瑶城宅陽俗言水城非矣濟水自澤東出即是始矣王隱曰河決為滎濟水受焉故有濟堤矣謂此濟也

案近刻訛作為北濟

也濟水又東南逕釐城東春秋經書公會鄭伯于時

來左傳所謂釐也京相璠曰今滎陽縣東四十里有

故釐城也濟水右合黃水

案右近刻訛作又

水發源京縣黃

堆山

案近刻訛作黃淮止

東南流名祝龍泉泉勢沸湧狀若巨



鼎揚湯

案近刻訛作湯湯

西南流謂之龍項口世謂之京水

也又屈而北注魚子溝水入焉水出石暗澗東北流

又北與漭漭水合水出西溪東流水上有連理樹其

樹柞櫟也

案近刻脫樹字

南北對生凌空交合溪水歷二樹

之間東流注于魚水魚水又屈而西北注黃水黃水

又北逕高陽亭東又北至故市縣重泉水注之水出

京城西南少陁山

案少陁近刻訛作小陸

東北流又北流逕高

陽亭西東北流注于黃水又東北逕故市縣故城南

漢高帝六年

案漢近刻訛作溪

封閭澤赤為侯國河南郡之

屬縣也

案近刻脫河南郡之四字

黃水又東北至滎澤南分為二

水一水北入滎澤下為船塘俗謂之邾城陂東西四

十里南北二十里竹書穆天子傳曰甲寅

案近刻訛作甲辰

天子浮于滎水乃奏廣樂是也一水東北流即黃雀

溝矣穆天子傳曰壬寅天子東至于雀梁者也又東

北與靖水枝津合二水之會為黃淵

案近刻訛作泉

北流注

于濟水

又東過陽武縣南

案原本及近刻竝訛作縣北考南濟在陽武南其在陽武北者乃北濟觀

道元于此下叙南濟所逕而北濟則追叙於後封丘下經本作縣南明矣今改正

濟水又東南流入陽武縣歷長城東南流蒗蕩渠出

焉濟水又東北流南濟也逕陽武縣故城南

案此十六字原

本及近刻竝訛作經今考上下文乃注內叙南濟所逕而此句則釋經所謂東過陽武縣南也

王莽

更名之曰楊桓矣又東為白馬淵淵東西二里南北

百五十步淵流名為白馬溝

案近刻淵作泉脫馬字

又東逕房

城北穆天子傳曰天子里甫田之路東至於房疑即

斯城也郭注以為趙郡房子也余謂穆王里鄭甫而

郭以趙之房邑為疆更為非矣濟水又東逕封丘縣

南

案此九字原本及近刻竝訛作經今考此注內叙南濟所逕

又東逕大梁城北

又東逕倉垣城又東逕小黃縣之故城北縣有黃亭

說濟又謂之曰黃溝

案此句之上當有脫文未詳

縣故陽武之東

黃鄉也故水以名縣

案此句亦有脫誤

沛公起兵野戰喪皇

妣于黃鄉天下平定乃使使者以梓宮招魂幽野于

是丹蛇自水濯洗

案蛇近刻訛作旄

入于梓宮其浴處有遺

髮焉故諡曰昭靈夫人因作寢以寧神也濟水又東

逕東昏縣故城北

案此十一字原本及近刻竝訛作經今考亦注內叙南濟所逕陽

武縣之戶牖鄉矣漢丞相陳平家焉平少為社宰以

善均肉稱今民祠其社平有功于高祖封戶牖侯是

後置東昏縣也王莽改曰東明矣濟水又東逕濟陽

縣故城南

案此十一字原本及近刻竝訛作經今考亦注內叙南濟所逕

故武父城

也城在濟水之陽故以為名王莽改之曰濟前者也

先武生濟陽宮光明照室即其處也東觀漢記曰先

武以建平元年生于濟陽縣是歲有嘉禾生一莖九穗大于凡禾縣界大熟因名曰秀

### 又東過封丘縣北

北濟也

案此三字原本及近刻竝訛作經考濟自滎澤流出有南濟北濟之分南濟行陽武封丘

濟陽冤胸定陶之南而不逕其北北濟則行陽武封丘濟陽冤胸定陶之北而不逕其南作水經者叙濟水東過陽武南封丘北平丘南濟陽北冤胸定陶南道元不顯言其非因于過陽武南下叙南濟逕陽武封丘濟陽南于過封丘北平丘南濟陽北下皆以北濟釋之于過冤胸定陶南下又叙南濟所逕其北濟之逕冤胸定陶北則補叙于從乘氏縣東北流入鉅野澤下經雖舛誤注內分南濟北濟各有條理自注

多訛為經于是愈益清  
紊不可讀今詳為訂正

自滎澤東逕滎陽卷縣之武

脩亭南春秋左傳成公十年鄭子然盟于脩澤者也

鄭地矣杜預曰卷東有武脩亭濟水又東逕原武縣

故城南

案此十一字原本及近刻竝訛作經考原武在陽武封丘之西乃注內叙北濟所逕不得

與經清紊今改正

春秋之原圃也穆天子傳曰祭父自圃鄭

來謁天子夏庚午天子飲于洧上乃遣祭父如圃鄭

是也王莽之原桓矣濟瀆又東逕陽武縣故城北又

東絕長城

案此下近刻有築也二字衍

按竹書紀年梁惠成王十

二年龍賈率師築長城于西邊自亥谷以南鄭所城

矣竹書紀年云是梁惠成王十五年築也

案近刻脫成字

郡

國志曰長城自卷逕陽武到密者是矣濟瀆又東逕

酸棗縣之烏巢澤澤北

案近刻脫一澤字又此十四字原本及近刻竝訛作經考

烏巢澤在陽武東封丘西亦注內叙北濟所逕

有故市亭

案近刻脫市字

晉太康地

記曰澤在酸棗之東南昔曹太祖納許攸之策破袁

紹運處也濟瀆又東逕封丘縣北

案近刻脫北字

南燕縣之

延鄉也其在春秋為長丘焉應劭曰左傳宋敗狄于



長丘獲長狄緣斯是也漢高帝封翟盱為侯國

案近刻脫

此三字

濮水出焉濟瀆又東逕大梁城之赤亭北而東

注

又東過平丘縣南

北濟也

案此三字原本及近刻竝訛作經

縣故衛地也春秋魯昭公

十三年諸侯盟于平丘是也縣有臨濟亭田儋死處

也又有曲濟亭皆臨側濟水者

案此句六字原本及近刻竝截下三字訛

作經上三字  
仍屬注文

又東過濟陽縣北

北濟也

案原本及近刻竝脫此字下二字訛作經今補正

自武父城北

案北下原

本及近刻竝有圈稱曰三字因下文即引圈稱陳留風俗傳故訛而致衍

闕駟曰在縣西

北鄭邑也東逕濟陽縣故城北圈稱陳留風俗傳曰

縣故宋地也竹書紀年梁惠成王三十年城濟陽漢

景帝中六年

案中下近刻衍元字

封梁孝王子明為濟川王應

劭曰濟川今陳留濟陽縣

案近刻脫留字

是也

又東過冤朐縣南又東過定陶縣南

南濟也

案此三字原本及近刻竝訛作經

濟瀆自濟陽縣故城南東

逕戎城北春秋隱公二年公會戎于潛杜預曰陳留

濟陽縣東南有戎城是也濟水又東北荷水東出焉

案此十字原本及近刻竝訛作經今考濟別出為荷值冤胸之西乃注內追叙南濟所逕濟水又

東北逕冤胸縣故城南吕后元年封楚元王子劉執

為侯國王莽之濟平亭也濟水又東逕秦相魏冉冢

南

案此十一字原本及近刻竝訛作經今考魏冉冢恭王陵皆值冤胸之東定陶之西亦注內叙南濟

所逕冉秦宣太后弟也代客卿壽燭為相封于穰益封

于陶號曰穰侯富于王室范雎說秦秦王悟其擅權  
免相就封出關輜車千乘卒于陶而因葬焉世謂之  
安平陵墓南崩碑尚存濟水又東北逕定陶恭王陵

南

案此十二字原本及近刻竝訛作經

漢哀帝父也帝即位母丁太后

建平二年崩上曰宜起陵于恭皇之園遂葬定陶貴  
震山東王莽秉政貶號丁姬開其槨尸火出炎四五  
丈吏卒以水沃滅乃得入燒燔槨中器物公卿遣子  
弟及諸生四夷十餘萬人操持作具助將作掘平共

王母傳太后墳及丁姬冢二旬皆平莽又周棘其處

以為世戒云時有羣燕數千銜土投于丁姬窀中今

其墳冢巍然尚秀隅阿相承列郭數周面開重門南

門內夾道有崩碑二所世尚謂之丁昭儀墓又謂之

長隧陵蓋所毀者傳太后陵耳丁姬墳墓事與書違

不甚過毀未必一如史說也墳南

案墳近刻訛作瀆

魏郡治

也世謂之左城亦名之曰葬城蓋恭王之陵寢也濟

水又東北逕定陶縣故城南

案此十二字原本及近刻竝訛作經側城

東注

案此下近刻衍也字

縣故三駸國也湯追桀伐三駸即此

周武王封弟叔振鐸之邑故曹國也漢宣帝甘露二

年更濟陰為定陶國王莽之濟平也戰國之世范蠡

既雪會稽之恥乃變姓名寓于陶為朱公以陶天下

之中諸侯四通貨物之所交易也治產致千金富好

行德子孫修業遂致巨萬故言富者皆曰陶朱公也

又屈從縣東北流

南濟也

案此三字原本及近刻並訛作經

又東北右合河水

案河原本及近

刻竝訛作河下同

水上承濟水于濟陽縣東世謂之五大溝

又東逕陶丘北地理志曰禹貢陶丘在定陶西南

案近

刻訛作禹貢定陶西南有陶丘

陶丘亭在南墨子以為釜丘也竹書

紀年魏襄王十九年薛侯來會王于釜丘者也尚書

所謂導菏水自陶丘北謂此也菏水東北出于定陶

縣北屈左合汜水汜水西分濟瀆東北逕濟陰郡南

爾雅曰濟別為瀧呂忱曰水決復入為汜

案爾雅乃汜字音似

與此處汜水下云取其汜愛者異道元誤引

廣異名也汜水又東合于菏

瀆昔漢祖既定天下即帝位于定陶汜水之陽張晏

曰汜水在濟陰界取其汜愛弘大而潤下也汜水之

名

案近刻脫之字

于是乎在矣荷水又東北

案荷原本訛作河近刻訛作汜

逕定陶縣南又東北右合黃水枝渠渠上承黃溝東北合荷而北注濟瀆也



水經注卷七

總校官庶吉士  
金壽司  
對官庶吉士

總校官庶吉士臣張能照

校對官庶吉士臣嚴福

膳錄監生臣顧振

膳錄監生臣陸學稼

欽定四庫全書薈要

史部

水經注卷八

臣紀昀詳校

詳校官編修臣繆晉



欽定四庫全書薈要卷七千六百十九

史部

水經注卷八

後魏 酈道元 撰

濟水

案二字原本訛作經文又東上近刻又增濟水二三字表目

又東至乘氏縣西分為二

春秋左傳僖公三十一年

案原本訛作二十八年近刻訛作三十四年今據左

傳改正

分曹地東傳于濟濟水自是東北流

案近刻訛作北東流

出鉅澤

其一水東南流其一水從縣東北流入鉅野澤

案此十八字原

本及近刻竝訛入注內接出鉅澤下今考下云經所謂濟水自乘氏縣兩分東北入于鉅野也可證此屬經文

南為荷水北為濟瀆

案此八字原本及近刻竝訛作經

逕乘氏縣與

濟渠濮渠合北濟自濟陽縣北東北逕煮棗城南郡

國志曰冤朐縣有煮棗城即此也漢高祖十二年封

革朱為侯國北濟又東北逕冤朐縣故城北

案此十二字原

本及近刻竝訛作經今考前卷注內叙北濟至濟陽止此復補叙濟陽以下北濟所逕

又東北

逕呂都縣故城南王莽更名之曰祁都也又東北逕

定陶縣故城北漢景帝中六年

案此三字近刻作中元六年又訛在東注

下以濟水出其北東注分梁于定陶置濟陰國指北

濟而定名也

案近刻國訛作郡北訛作為

又東北與濮水合

案此七字

原本及近刻並訛作經

水上承濟水于封丘縣即地理志所謂

濮渠水首受濟者也闕駟曰首受別濟即北濟也其

故瀆自濟東北流左逌為高梁陂方三里濮水又東

逕匡城北孔子去衛適陳遇難于匡者也又東北左

會別濮水受河于酸棗縣故杜預云濮水出酸棗縣

首受河竹書紀年曰魏襄王十年十月大霖雨疾風

河水溢酸棗郭漢世塞之故班固云文堙棗野

案近刻訛

作大堙酸棗也

今無水其故瀆東北逕南北二棣城間左傳

襄公五年楚子囊伐陳公會于城棣以救之者也濮

渠又東北逕酸棗縣故城南韓國矣圈稱曰昔天子

建國名都或以令名

案令近刻訛作合

或以山林故豫章以

樹氏郡

案近刻訛作都

酸棗以棘名邦故曰酸棗也漢官儀

曰舊河堤謁者居之城西有韓王望氣臺孫子荆故

臺賦叙曰酸棗寺門外夾道左右有兩故臺訪之故

老云

案故近刻訛作國

韓王聽訟觀臺高十五仞雖樓榭泯

滅然廣基似于山嶽召公大賢猶舍甘棠區區小國

而臺觀隆崇驕盈于世以鑒來今故作賦曰蔑丘陵

之邈迤亞五嶽之嵯峨言壯觀也城北韓之市地也

聶政為濮陽嚴仲子刺韓相俠累遂皮面而死

案皮近刻

訛作披

其姊哭之于此城內有後漢酸棗令劉孟陽碑

濮水北積成陂

案積近刻訛作稱

陂方五里號曰同池陂又



東逕胙亭東注故胙國也富辰所謂邢茅胙祭周公

之脣也濮渠又東北逕燕城南

案近刻訛作內

故南燕姑姓

之國也有北燕故以南氏縣東為陽清湖陂南北五

里東西三十里亦曰燕城湖逕桃城南即戰國策所

謂酸棗虛桃者也

案虛桃近刻訛作桃虛脫者字

漢高帝十二年封

劉襄為侯國而東注于濮俗謂之朝平溝濮渠又東

北又與酸水故瀆會酸瀆首受河于酸棗縣東逕酸

棗城北延津南謂之酸水竹書紀年曰秦蘇胡率師

伐鄭韓襄敗秦蘇胡于酸水者也酸瀆水又東北逕

燕城北又東逕滑臺城南又東南逕瓦亭南春秋定

公八年公會晉師于瓦魯尚執羔自是會始也又東

南會于濮世謂之百尺溝濮渠之側有漆城竹書紀

年梁惠成王十六年邯鄲伐衛取漆富丘城之者也

或亦謂之宛濮亭

案宛近刻作苑下同又訛在濮字下

春秋甯武子與

衛人盟于宛濮杜預曰長垣西南

案西近刻訛作而

近濮水

也京相璠曰衛地也似非關宛

案近刻訛作苑

而不知其所

竹書紀年梁惠成王五年公子景賈率師伐鄭韓明  
戰于陽我師敗逋澤北有壇陵亭

案近刻脫有字

亦或謂之

大陵城非所究也又有桂城竹書紀年梁惠成王十  
七年齊田期伐我東鄙戰于桂陽我師敗逋亦曰桂  
陵案史記齊威王使田忌擊魏敗之桂陵齊于是彊  
自稱為王以令天下濮渠又東逕蒲城北故衛之蒲  
邑孔子將之衛子路出于蒲者也韓子曰魯以仲夏  
起長溝子路為蒲宰以私粟饋衆孔子使子貢毀其

器焉余案家語言仲由為邱宰

案近刻訛作蒲宰

脩溝瀆與

之簞食瓢飲夫子令賜止之無魯字又入其境三稱

其善身為大夫終死衛難濮渠又東逕韋城南即白

馬縣之韋鄉也史遷記曰夏伯豕韋之故國矣城西

出而不方城中有六大井皆隧道下俗謂之江井也

有馳道自城屬于長垣濮渠東絕馳道東逕長垣縣

故城北衛地也故首垣矣秦更從今名王莽改為長

固縣陳留風俗傳曰縣有防垣故縣氏之孝安帝以

建光元年封元舅宋俊為侯國縣有祭城濮渠逕其  
北鄭大夫祭仲之邑也杜預曰陳留長垣縣東北有  
祭城者也圈稱又言長垣縣有羅亭故長羅縣也漢  
封後將軍常惠為侯國地理志曰王莽更長羅為惠  
澤後漢省并長垣有長羅澤即吳季英牧豬處也又  
有長羅岡蘧伯玉岡陳留風俗傳曰長垣縣有蘧伯  
鄉一名新鄉有蘧亭伯玉祠伯玉冢曹大家東征賦  
曰到長垣之境界兮察農野之居民覩蒲城之丘墟

兮生荆棘之蓁蓁蘧氏在城之東南兮民亦嚮其丘

墳

案嚮近刻訛作饗

惟令德之不朽兮身既沒而名存昔吳

季札聘上國至衛觀典府賓亭父疇以衛多君子也

濮渠又東分為二瀆北濮出焉濮渠又東逕須城北

衛詩云思須與曹也毛云須衛邑矣鄭云自衛而東

逕邑故思濮渠又北逕襄丘亭南竹書紀年曰襄王

七年韓明率師伐襄丘九年

案近刻訛作十年

楚庶章率師

來會我次于襄丘者也濮水又東逕濮陽縣故城南

昔師延為紂作靡靡之樂武王伐紂師延東走自投

濮水而死矣後衛靈公將之晉而設舍于濮水之上

夜聞新聲召師涓受之于是水也濮水又東逕濟陰

離狐縣故城南王莽之所謂瑞狐也郡國志曰故屬

東郡濮水又東逕葭密縣故城北竹書紀年元公三

年

案近刻訛作  
幽王十三年

魯季孫會晉幽公于楚丘

案幽公近  
刻訛作文

公

取葭密

案取近刻  
訛作即

遂城之濮水又東北逕鹿城南

郡國志曰濟陰乘氏縣有鹿城鄉

案城近刻  
訛作乘

春秋僖

公二十一年盟于鹿上京杜竝謂此亭也濮水又東

與句瀆合

案近刻脫此二字

瀆首受濮水枝渠于句陽縣東

南逕句陽縣故城南春秋之穀丘也左傳以為句瀆之丘矣縣處其陽故縣氏焉又東入乘氏縣左會濮水與濟同入鉅野故地理志曰濮水自濮陽南入鉅

野亦經所謂濟水自乘氏縣兩分東北入于鉅野也

濟水故瀆又北右合洪水

案此十字原本及近刻竝訛作經

水上承

鉅野薛訓渚歷澤西北

案此下近刻衍渚字

又北逕闕鄉城西



春秋桓公十有一年經書公會宋公于闕郡國志曰

東平陸有闕亭皇覽曰蚩尤冢在東郡壽張縣闕鄉

城中冢高七尺常十月祠之有赤氣出如絳民名為

蚩尤旗十三州志曰壽張有蚩尤祠又北與濟瀆合

案近刻  
脫與字

自渚迄于北口百二十里名曰洪水桓溫以

太和四年率衆北入掘渠通濟至義熙十三年劉武

帝西入長安又廣其功自洪口已上又謂之桓公瀆

濟自是北注也春秋莊公十八年經書夏公追戎于

濟西京相璠曰濟水自鉅野至濟北是也

又東北過壽張縣西界安民亭南汶水從東北來注之

濟水又北汶水注之戴延之所謂清口也郭緣生述

征記曰清河首受洪水北注濟

案注近刻訛作流

或謂清即

濟也禹貢濟東北會于汶今枯渠注鉅澤鉅澤北則

清口

案近刻訛作水

清水與汶會也李欽曰汶水出太山萊

蕪縣西南入濟是也濟水又北逕梁山東袁宏北征

賦曰背梁山截汶波即此處也劉澄之引是山以證

梁父為不近情矣山之西南有呂仲悌墓河東岸有

石橋橋本當河河移故廁岸也

案廁近刻作側

古老言此橋

東海呂母起兵所造也山北三里有呂母宅宅東三

里即濟水濟水又北逕須朐城西

案此九字原本及近刻竝訛作經

城臨側濟水故須朐國也

案近刻作故須國風姓也

春秋僖公二

十一年子魚曰任宿須朐顓臾風姓也寔司太皞與

有濟之祀

案此非子魚語道元偶誤引耳朱謀瑋云左傳楚執宋公以伐宋冬會于薄以釋之

子魚曰禍猶未也未足以懲君則子魚之語已卒于此其任宿須朐等語別自更端為邾人滅須朐張本

杜預曰須朐在須昌縣西北非也地理志曰壽張西

北有朐城者是也濟水西有安民亭亭北對安民山

東臨濟水水東即無鹽縣界也山西有冀州刺史王

紛碑漢中平四年立濟水又北逕微鄉東

案此八字原本及近

刻竝訛作經

春秋莊公二十八年經書冬築鄒京相璠曰

公羊傳謂之微

案此下近刻行在字

東平壽張縣西北三十里

有故微鄉魯邑也杜預曰有微子冢濟水又北分為

二水其枝津西北出

案此下近刻有馬字

謂之馬頰水者也

又北過須昌縣西

京相璠曰須朐一國二城兩名蓋遷都須昌朐是其本秦以為縣漢高帝十一年封趙衍為侯國濟水于

縣趙溝水注之濟水又北逕魚山東左合馬頰水

案此

十三字原本及近刻竝訛作經

水首受濟西北流歷安民山北又西

流趙溝出焉東北注于濟馬頰水又逕桃城東春秋

桓公十年經書公會衛侯于桃丘衛地也杜預曰濟

北東阿縣東南有桃城

案近刻脫城字

即桃丘矣馬頰水又

東北流逕魚山南

案近刻脫魚字

山即吾山也漢武帝瓠子

歌所謂吾山平者也山上有柳舒城

案柳近刻訛作抑

魏東

阿王曹子建每登之有終焉之志及其終也葬山西

西去東阿城四十里

案城近刻訛作水

其水又東注于濟

案近

刻濟上謂之馬頰口也濟水自魚山北逕清亭東

案此

十字原本及近刻竝訛作經

春秋隱公四年公及宋公遇于清

案此

下近刻衍者也二字

京相璠曰今濟北東阿東北四十里有故

清亭即春秋所謂清者也是下濟水通得清水之目

馬

案近刻脫下字

亦水色清深用兼厥稱矣是故燕王曰吾

聞齊有清濟濁河以為固

案濁近刻訛作濟

即此水也

又北過穀城縣西

濟水側岸有尹卯壘南去魚山四十餘里是穀城縣

界故春秋之小穀城也齊桓公以魯莊公二十三年

城之邑管仲焉城內有夷吾井魏土地記曰縣有穀

城山山出文石陽穀之地春秋齊侯宋公會于陽穀

者也縣有黃山臺

案縣近刻訛作穀

黃石公與張子房期處

也又有狼水出東南大檻山狼溪

案此下近刻有西狼溪三字衍

北逕穀城西又北有西流泉出城東近山西北逕穀城北西注狼水以其流西故即名焉又西北入濟水

案近刻說作清水

城西北三里有項王羽之冢半許毀壞石

碣尚存題云項王之墓皇覽云冢去縣十五里謬也

今彭城穀陽城西南又有項羽冢非也余案史遷記

魯為楚守漢王示羽首魯乃降遂以魯公禮葬羽于

穀城寧得言彼也濟水又北逕周首亭西

案此九字原本及近



刻並訛  
作經

春秋文公十有一年

案一近刻訛作二

左丘明云襄

公二年王子成父獲長狄僑如弟榮如埋其首于周  
首之北門即是邑也今世謂之盧子城濟北郡治也  
京相璠曰今濟北所治盧子城故齊周首邑也

又北過臨邑縣東

地理志曰縣有濟水祠王莽之穀城亭也水有石門  
以石為之故濟水之門也春秋隱公五年齊鄭會于  
石門鄭車僨濟即于此也京相璠曰石門齊地今濟

北盧縣故城西南六十里有故石門去水三百步蓋

水瀆流移故側岸也濟水又北逕平陰城西

案此九字原本

及近刻竝訛作經

春秋襄公十八年晉侯沈玉濟河會于魯

濟尋湫梁之盟同伐齊齊侯禦諸平陰者也杜預曰  
城在盧縣故城東北非也京相璠曰平陰齊地也在  
濟北盧縣故城西南十里平陰城南有長城東至海  
西至濟河道所由名防門去平陰三里齊侯塹防門  
即此也其水引濟故瀆尚存今防門北有光里齊人

言廣音與光同即春秋所謂守之廣里者也又云巫

山在平陰東北昔齊侯登望晉軍畏衆而歸師曠邢

伯聞鳥鳥之聲知齊師潛遁人物咸淪地理昭著賢

于杜氏東北之證矣今巫山之上石室世謂之孝

子堂濟水右迤過為湄湖

案過近刻訛作過

方四十餘里濟

水又東北逕垣苗城西

案此十字原本及近刻竝訛作經

故洛當城

也伏韜北征記曰濟水又與清河合流至洛當者也

宋武帝西征長安令垣苗鎮此

案垣苗近刻訛作桓遵

故俗又

有垣苗城之稱

案近刻訛作故俗人有垣苗之稱

河水自四瀆口東

北流而為濟

案四原本及近刻竝訛作泗今改正四瀆口見卷五河水內又濟近刻訛作蒲

魏土地記曰盟津河別流十里與清水合亂流而東逕洛當城北黑白異流湮渭殊別而東南流注也

又東北過盧縣北

濟水東北與湄溝合水上承湄湖北流注濟爾雅曰水草交曰湄通谷者微捷為舍人曰水中有草木交合也郭景純曰微水邊通谷也釋名曰湄眉也臨水

如眉臨目也濟水又逕盧縣故城北

案此九字原本及近刻並訛作

經

濟北郡治也漢和帝永元二年分泰山置蓋以濟

水在北故也濟水又逕什城北城際水湄故邸閣也

祝阿人孫什將家居之以避時難因謂之什城焉濟

水又東北與中川水合

案此十字原本及近刻並訛作經

水東南出

山莊縣之分水嶺溪一源兩分泉流半解亦謂之分

流交半水南出太山入汶半水出山莊縣西北流逕

東太原郡南

案東字近刻訛在逕字上考東太原係劉宋僑置

郡治山爐固

案山爐地名改作山莊西者非

北與賓溪水合

案近刻訛作與漢賓谷水合

水出

南格馬山賓溪谷

案近刻賓上行漢字又脫谷字

北逕盧縣故城北

陳敦戍南西北流與中川水合謂之格馬口其水又

北逕盧縣故城東而北流入濟俗謂之為沙溝水濟

水又東北右會玉水

案此九字原本及近刻竝訛作經

水導源太山

朗公谷

案近刻重一谷字

舊名琨瑞溪有沙門竺僧朗少事

佛圖澄碩學淵通尤明氣緯隱于此谷因謂之朗公

谷故車頻秦書云苻堅時沙門竺僧朗嘗從隱士張

巨和遊巨和常穴居而朗居琨瑞山大起殿舍連樓

累閣

案累近刻訛作疊

雖素飾不同竝以靜外致稱即此谷

也水亦謂之琨瑞水也其水西北流逕玉符山又曰

玉水又西北逕獵山東又西北枕祝阿縣故城東野

井亭西春秋昭公二十五年經書齊侯唁公于野井

是也春秋襄公十九年諸侯盟于祝柯

案近刻訛作阿

左傳

所謂督陽者也漢興改之曰阿矣漢高帝十一年封

高邑為侯國王莽之安成者也故俗謂是水為祝阿

澗水北流注于濟建武五年耿弇東擊張步從朝陽

橋濟渡兵即是處也濟水又東北灤水入焉

案此九字原本

及近刻竝訛作經入訛作出

水出歷城縣故城西南

案歷城近刻脫城字

泉

源上奮水涌若輪春秋桓公十八年公會齊侯于灤

是也俗謂之為娥姜水以泉源有舜妃娥英廟故也

城南對山山上有舜祠山下有大穴謂之舜井抑亦

茅山禹井之比矣書舜耕歷山亦云在此所未詳也

其水北為大明湖西即大明寺寺東北兩面側湖此



水便成淨池也池上有客亭左右楸桐負日俯仰目

對魚鳥

案此下近刻衍極字

水木明瑟可謂濠梁之性物我無

違矣湖水引瀆東入西郭東至歷城西而側城北注

陂水上承東城歷祀下泉

案陂近刻作湖

泉源競發

案近刻脫泉字

其水北流逕歷城東又北引水為流杯池州僚賓燕

公私多萃其上分為二水右水北出左水西逕歷城

北西北為陂謂之歷水與灤水會又北歷水枝津

案此

六字近刻訛作自水枝津合水

首受歷水于歷城東東北逕東城西

而北出郭又北注灤水又北聽水出焉灤水又北流

注于濟謂之灤口也濟水又東北

案此句之下朱謀埠云脫一逕字據

華不注山乃華水之源非濟水所逕箋說非也又此五字原本及近刻竝訛作經

華不注山

案此四字原本及近刻亦竝訛作經

單椒秀澤不連丘陵以自高虎牙

桀立孤峯特拔以刺天青崖翠發望同點黛山下有

華泉故京相璠春秋土地名曰

案曰字近刻訛在春字上名下復衍也字

華泉華不注山下泉水也春秋左傳成公二年齊頃

公與晉卻克戰于鞏齊師敗績逐之三周華不注逢

丑父與公易位將及華泉驂絰于木而止丑父使公  
下如華泉取飲齊侯以免韓厥獻丑父郤子將戮之  
呼曰自今無有代其君任患者有一于此將為戮矣  
郤子曰人不難以死免其君我戮之不祥赦之以勸  
事君者乃免之即華水也北絕聽瀆二十里注于濟  
又東北過臺縣北

巨合水南出雞山西北北逕巨合故城西耿弇之討  
張步也守巨里即此城也三面有城西有深坑坑西

即弇所營也與費邑戰斬邑于此巨合水又北合關

盧水

案此下近刻  
衍關盧二字

水導源馬耳山北逕博亭城西西

北流至平陵城

案陵近刻  
訛作陸

與武原水合水出譚城南

平澤中世謂之武原淵

案近刻  
訛作泉

北逕譚城東俗謂之

布城也

案布近刻  
訛作有

又北逕東平陵縣故城西故陵城

也後乃加平譚國也齊桓之出過譚譚不禮焉魯莊

公九年即位又不朝十年滅之城東門外有樂安任

照先碑濟南郡治也

案近刻  
脫郡字

漢文帝十六年置為王

國景帝二年為郡王莽更名樂安

案此下近刻衍郡字

其水又

北逕巨合城東漢武帝以封城陽頃王子劉發為侯

國

案發下近刻衍于字

其水合關盧水西出注巨合水

案西近刻訛作

而

巨合水西北逕臺縣故城南漢高帝六年封東郡

尉戴野為侯國王莽之臺治也其水西北流白野泉

水注之水出臺城西南白野泉北逕留山西北流而

右注巨合水巨合水又北聽水注之水上承灤水東

流北屈又東北流注于巨合水亂流又北入于濟濟

水又東北合芹溝水

案此九字原本及近刻竝訛作經

水出臺縣故

城東南西北流逕臺城東又西北入于濟水

又東北過管縣南

濟水東逕縣故城南漢文帝四年

案近刻訛作景帝二年

封齊

悼惠王子罷軍為侯國右納百脈水

案此下近刻行百脈二字水

出土鼓縣故城西

案鼓原本及近刻竝訛作穀今據漢書改正

水源方百

步百泉俱出故謂之百脈水其水西北流逕陽丘縣

故城中

案陽近刻訛作楊下同

漢孝文帝四年

案文帝近刻訛作景帝

以

封齊悼惠王子劉安為陽丘侯世謂之章丘城非也  
城南有女郎山山上有神祠俗謂之女郎祠左右民  
祀焉其水西北出城北逕黃巾固蓋賊所屯故固得  
名焉百脈水又東北流注于濟濟水又東

案近刻訛作東又

有楊渚溝水出逢陵故城西南二十里

案出逢陵近刻訛作逕於

陵又脫二  
十里三字

西北逕土鼓城東又西北逕章丘城東又

北逕甯戚城西

案近刻脫  
戚城二字

而北流注于濟水也

又東過梁鄒縣北

隴水南出長城中北流至般陽縣故城西南與般水  
會水出縣東南龍山俗亦謂之為左阜水西北逕其  
城南王莽之濟南亭也應劭曰縣在般水之陽故資  
名焉

案故近刻訛作縣

其水又南屈西入隴水隴水北逕其

縣西北流至萌水口

案此下近刻衍萌字

水出西南甲山東北

逕萌山西東北入于隴水隴水又西北至梁鄒東南

與魚子溝水合水南出長白山東柳泉口

案柳近刻訛作柳

山即陳仲子夫妻之所隱也孟子曰仲子齊國之世



家兄戴祿祿萬鍾仲子非而不食避兄離母家于於陵  
即此處也其水又逕於陵縣故城西王莽之於陸也  
世祖建武十五年更封則鄉侯侯霸之子昱為侯國  
案近刻脫之子昱三字其水北流注于隴水隴水即古袁水也  
故京相璠曰濟南梁鄒縣有袁水者也隴水又西北  
逕梁鄒縣故城南又北屈逕其城西漢高祖六年封  
武虎為侯國其水北注濟城之東北又有時水西北  
注焉

又東北過臨濟縣南

縣故狄邑也王莽更名利居漢記安帝永初二年改

從今名以臨濟故地理風俗記云

案此下近刻衍有字

樂安太

守治晏謨齊記曰有南北二城隔濟水南城即被陽

縣之故城也北枕濟水地理志曰侯國也如淳曰一

作疲音罷軍之罷也史記建元以來王子侯者年表

曰漢武帝元朔四年封齊孝王子敬侯劉燕之國也

今渤海僑郡治濟水又東北逌為淵者謂之平州

案此

十三字原本及近刻竝訛作經

漂沃縣側有平安故城

案縣字近刻訛在安字下

俗謂之會城非也案地理志千乘郡有平安縣侯國

也王莽曰鴻睦也應劭曰博昌縣西南三十里有平

安亭故縣也世尚存平州之名矣濟水又東北逕高

昌縣故城西案地理志千乘郡有高昌縣漢宣帝地

節四年封董忠為侯國世謂之馬昌城非也

案非近刻訛作

此濟水又東北逕樂安縣故城南

案此十二字原本及近刻竝訛作經

伏琛齊記曰博昌城西北五十里有南北二城相去

三十里隔時濟二水指此為博昌北城非也樂安與

博昌薄姑分水俱同西北薄姑去齊城六十里樂安

越水差遠驗非尤明班固曰千乘郡有樂安縣應劭

曰取休令之名矣漢武帝元朔五年封李蔡為侯國

城西三里有任光等冢先是宛縣人

案近刻脫宛字

不得為

博昌明矣濟水又經薄姑城北後漢郡國志曰博昌

縣有薄姑城地理書曰呂尚封于齊郡薄姑薄姑故  
城在臨淄縣西北五十里近濟水史遷曰獻公徙薄

姑

案獻公近刻訛作胡公

城內有高臺春秋昭公二十年齊景

公飲于臺上曰古而不死何樂如之晏平仲對曰昔  
爽鳩氏始居之季荊因之有逢伯陵又因之薄姑氏  
又因之而後太公因之臣以為古若不死爽鳩氏之  
樂非君之樂即于是臺也濟水又東北逕狼牙固西  
而東北流也

又東北過利縣西

地理志齊郡有利縣王莽之利治也晏謨曰縣在齊

城北五十里也

案齊近刻訛作濟又脫也字

又東北過甲下邑入于河

濟水東北至甲下邑南東歷琅槐縣故城北地理風俗記曰博昌東北八十里有琅槐鄉故縣也山海經

曰濟水絕鉅野注渤海入齊琅槐東北者也

案齊原本及近

刻竝訛作濟今改正

又東北河水枝津注之水經以為入河非

也斯乃河水注濟非濟入河又東北入海

案此五字原本及近

刻竝訛作經今考經言濟水入河其文已終觀此郭下仍辯經濟水入河之非可證五字屬注文甚明郭

景純曰濟自滎陽至樂安博昌入海今河竭濟水仍  
流不絕經言入河二說竝失然河水于濟漯之北別  
流注海今所輟流者惟漯水耳郭或以為濟注之即  
實非也

案即近刻  
訛作事

尋經脈水不如山經之為密矣

其一水東南流者過乘氏縣南

案近刻  
脫南字

荷水分濟于定陶東北

案荷近刻訛  
作河下同

東南右合黃溝

枝流俗謂之界溝也北逕已氏縣故城西

案已近刻  
訛作元

又北逕景山東衛詩所謂景山與京者也毛公曰景

山大山也又北逕楚丘城西郡國志曰成武縣有楚丘亭杜預云楚丘在成武縣西南衛懿公為狄所滅衛文公東徙渡河野處曹邑齊桓公城楚丘以遷之故春秋稱邢遷如歸衛國忘亡即詩所謂升彼虛矣以望楚矣望楚與堂景山與京故鄭玄言觀其旁邑及山川也又東北逕成武城西又東北逕郕城東疑郕徙也所未詳矣又東北逕梁丘城西

案丘近刻地訛作山

理志曰昌邑縣有梁丘鄉春秋莊公三十二年宋人



齊人會于梁丘者也杜預曰高平昌邑縣西南有梁丘鄉又東北于乘氏縣西而北注荷水荷水又東南逕乘氏縣故城南縣即春秋之乘丘也故地理風俗記曰濟陰乘氏縣故宋乘丘邑也漢孝景中五年

案中

下近刻衍元字

封梁孝王子買為侯國也地理志曰乘氏縣

泗水東南至睢陵入淮郡國志曰乘氏有泗水此乃

荷澤也

案荷澤近刻訛作河濟下同

尚書有導荷澤之說自陶丘

北東至于荷無泗水之文又曰導荷澤被孟豬孟豬

在睢陽縣之東北關駟十三州記曰不言入而言被

者明不常入也水盛方乃覆被矣澤水淼漫俱鍾淮

泗

案淮近刻訛作睢

故志有睢陵入淮之言以通苞泗名矣

然諸水注泗者多不止此可以終歸泗水便得擅通

稱也或更有泗水亦可是水之兼其目所未詳也

又東過昌邑縣北

荷水又東逕昌邑縣故城北地理志曰縣故梁也漢

景帝中六年

案中下近刻衍元字

分梁為山陽國

案此下近刻衍漢字

武

帝天漢四年更為昌邑國以封昌邑王髡

案近刻訛作賀賀

廢國除以為山陽郡王莽之鉅野郡也後更為高平

郡後漢沅州治

案近刻脫治字

縣令王密懷金謁東萊太守

楊震震不受是其慎四知處也大城東北有金城城

內有沅州刺史河東薛季像碑

案季近刻訛作崇

以郎中拜

剡令甘露降園熹平四年遷州明年甘露復降殿前

樹從事馮巡主簿華操等相與裛樹表勒崇政次西

有沅州刺史茂陵楊叔恭碑

案陵近刻訛作陽

從事孫光等

以建寧四年立西北有東太山成人班孟堅碑建和  
十年尚書右丞拜沅州刺史從事秦閏等  
案閏近刻訛作闕  
刊石頌德政碑咸列焉

又東過金鄉縣南

郡國志曰山陽有金鄉縣荷水逕其故城南世謂之  
故縣城北有金鄉山也

又東過東緡縣北

荷水又東逕漢平狄將軍扶溝侯淮陽朱鮪冢

案此十八

字原本及近刻竝訛作經  
荷訛作濟

墓北有石廟荷水又東逕東緡縣

故城北故宋地春秋僖公二十三年齊侯伐宋圍緡

十三州記曰山陽有東緡縣鄒衍曰余登緡城以望

宋都者也後漢世祖建武十一年封馮異長子璋為

侯國

又東過方與縣北為荷水

荷水東逕重鄉城南

案此八字原本及近刻竝訛作經又荷訛作濟

左傳所

謂臧文仲宿于重館者也荷水又東逕武棠亭北公

羊以為濟上邑也城有臺高二丈許

案臺字近刻訛在高字下

其

下臨水昔魯侯觀魚于棠謂此也在方與縣故城北

十里經所謂荷水也荷水又東逕泥母亭北春秋左

傳僖公七年秋盟于甯母謀伐鄭也荷水又東與鉅

野黃水合荷澤別名也

案澤近刻訛作齊

黃水上承鉅澤諸

陂澤有濛淀盲陂

案盲近刻訛作育

黃湖水東流謂之黃水

又有薛訓渚水自渚歷薛村前分為二流一水東注

黃水一水西北入澤即洪水也黃水東南流水南有

漢荊州刺史李剛墓剛字叔毅山陽高平人

案平近刻訛作

車

熹平元年卒見其碑有石闕祠堂石室三間椽架

高丈餘鏤石作椽瓦屋施平天造方井側荷梁柱

案荷

近刻訛作荷

四壁隱起雕刻為君臣官屬龜龍麟鳳之文

飛禽走獸之像作制工麗不甚傷毀黃水又東逕鉅野縣北何承天曰鉅野湖澤廣大南通洙泗北連清濟舊縣故城正在澤中故欲置戍于此城城之所在則鉅野澤也衍東北出為大野矣昔西狩獲麟于是

處也皇覽曰山陽鉅野縣

案野近刻訛作澤

有肩髀冢重聚

大小與闕冢等傳言蚩尤與黃帝戰克之于涿鹿之

野身體異處故別葬焉黃水又東逕咸亭北春秋桓

公七年經書焚咸丘者也水南有金鄉山

案近刻脫山字縣

之東界也金鄉數山皆空中穴口謂之隧也戴延之

西征記曰焦氏山北數里

案里近刻訛作山下復衍有字

漢司隸校

尉魯峻

案近刻訛作恭

穿山得白蛇白兔不葬更葬山南鑿

而得金故曰金鄉山山形峻峭冢前有石祠石廟四



壁皆青石隱起自書契以來忠臣孝子貞婦孔子及弟子七十二人形像像邊皆刻石記之文字分明又有石牀長八尺磨瑩鮮明叩之聲聞遠近時太尉從事中郎傅珍之諮議參軍周安穆拆敗石牀各取去為魯氏之後所訟二人竝免官焦氏山東即金鄉山也有冢謂之秦王陵山上二百步得冢口塹深十丈兩壁峻峭廣二丈入行七十步得埏門門外左右皆有空可容五六十人謂之白馬空埏門內二丈得外

堂外堂之後又得內堂觀者皆執燭而行雖無他雕鏤然治石甚精或云是漢昌邑哀王冢所未詳也東

南有范巨卿冢名件猶存

案名件近刻作石柱

巨卿名式山陽

之金鄉人漢荊州刺史與汝南張劭長沙陳平子石交號為死友矣黃水又東南逕任城郡之亢父縣故城西夏后氏之任國也漢章帝元和元年別為任城在北王莽之延就亭也縣有詩亭春秋之詩國也王莽更之曰順父矣地理志東平屬縣也世祖建武二

年封劉隆為侯國其水謂之桓公溝

案水近刻訛作中

南至

方與縣入于荷水荷水又東逕秦梁夾岸積石一里

高二丈言秦始皇東巡所造因以名焉

荷水又東過湖陸縣南東入于泗水

澤水所鍾也尚書曰浮于淮泗達于荷是也

案說文荷字下

亦引禹貢浮于淮泗達于荷

東觀漢記曰蘇茂殺淮陽太守得其

郡營廣樂大司馬吳漢圍茂茂將其精兵突至湖陵

案近刻訛作陸

與劉永相會濟陰山陽濟兵于此處也

又東南過沛縣東北

濟與泗亂故濟納互稱矣

案近刻濟訛作沛互訛作于

東觀漢記

安平侯蓋延傳曰延為虎牙大將軍與永等戰永軍

反走

案近刻訛作與戰水軍反走

溺水者半復與戰

案復近刻訛作後

連

破之遂平沛楚臨淮悉降延令沛脩高祖廟置嗇夫祝宰樂人因齋戒祠高廟也

又東南過留縣北

留縣故城翼佩泗濟宋邑也春秋左傳所謂侵宋呂

留也故繁休伯避地賦曰朝余發乎泗洲夕余宿于  
留鄉者也張良委身漢祖始自此矣終亦取封焉城  
內有張良廟也

又東過彭城縣北獲水從西來注之

案獲原本訛作雅  
近刻遂訛作睢注

同今改正獲水  
見卷之二十三

濟水又南逕彭城縣故城東北隅不東過也獲水自

西注之城北枕水湄濟水又南逕彭城縣故城東

案此

十一字原本及  
近刻竝訛作經

不逕其北也

案其下近  
刻衍縣字

蓋經誤證

又東南過徐縣北

地理志曰臨淮郡漢武帝元狩五年置治徐縣王莽

更之曰淮平縣曰徐調故徐國也

案近刻脫故徐二字

春秋昭

公三十年吳子執鍾吾子遂伐徐防山以水之遂滅

徐徐子奔楚楚救徐弗及遂城夷以處之張華博物

志錄著作令史茅溫所為送

案此三字當有脫誤未詳

劉成國徐

州地理志云徐偃王之異言徐君宮人娠而生卵以

為不祥棄之于水濱孤獨母有犬名曰鵠倉獵于水

側得棄卵銜以來歸孤獨母以為異

案近刻脫孤字

覆煖之

遂成兒生時偃故以為名徐君宮中聞之乃更錄取

長而仁智襲君徐國後鵠倉臨死生角而九尾寔黃

龍也偃王葬之徐中

案葬近刻訛作昔

今見有狗龍焉偃王

治國仁義著聞欲舟行上國乃通溝陳蔡之間

案通近刻

訛作導

得朱弓矢以得天瑞遂因名為號自稱徐偃王

江淮諸侯服從者三十六國周王聞之遣使至楚令  
伐之偃王愛民不鬪遂為楚敗北走彭城武原縣東

山下百姓隨者萬數因名其山為徐山山上立石室  
廟有神靈民人請禱焉依文即事似有符驗但世代  
綿遠難以詳矣今徐城外有徐君墓昔延陵季子解  
劍于此所謂不違心許也

又東至下邳睢陵縣南入于淮

濟水與泗水渾濤東南流

案渾濤近刻訛作澤洶

至角城同入

淮經書睢陵誤耳



水經注卷八